

A'na Cotasë ninshitërinso'

Imapisopita yonquiaton, nanan a'patërinso'

¹Ca Cotasëco ninshitaranquëma'. Santiaco iinco caso'. ¿Noyanquëma' canpitanta'? Canta' noya ya'huarahuë. Quisocristoichin natërahuë. Ina acorinco pënënta'huaso marë'. Quisocristo imaramasopita ninshitaranquëma'. Tata Yosë nohuanton, imarama'. Inaso' na'con nosororinquëma'. Quisocristo imarama' ni'ton, nóya a'pairinquëma', nicha'ësarinquëma'. ²Yosë na'con catahuainquëma'. Nanan anoyatërinpoa' ni'ton, na'con asanocancainquëma'. Nani tahuëriya nosoro'inquëma' canpitanta' noya noya nosorocamaso marë'.

Nonpin nanan a'china'piro'sa'

(2 Pedro 2.1-17)

³Carinquëma' iyaro'sa' nosororanquëma'. I'huamiáchin yonquirahuë ninshita'huanquëmaso marë'. Yosë anoyacancantërinpoaso' noya noya yaa'chintopiranquëmahüë', apira nanan natantërahuë. A'naquënso' nonpin nanan a'chintarinëinquëma', natantërahuë. Napoaton pënëna'huanquëmaso' ya'huërin, tënahüë. Quisocristo nanamën no'tëquën a'chintërainquëma'. Yosë nohuanton, no'tëquën ninshitërai ya'ipi imapisopita nitotacaiso marë'. Nani ya'ipiya nanamën anitotërinpoa'. Inasáchin natëtoma', a'napitanta' a'chintoco' no'tëquën yonquicaiso marë anta'. Ama pi'pian tëranta' nisha a'chintocosohüë', tënahüë. ⁴Tëhuëenchachin a'naquënso'

nonpin nanan a'chintarinëinquëma'. Pa'pi co noyahuë' inapitaso'. “Quiyanta' imarai,” taponaraihuë', co no'tëquën a'chinpihuë'. “Ma'sona nohuantërehuaso niahua'. Yosë nosororinpoa' ni'ton, co ana'intarinpoahuë',” ta'tona', pa'pi co noyahuë' nipi. No'pipi, monshihuanpi, a'naratipita nipi. Naporahuatona', co tëhuëenchachin Quisocristo imapihuë', inasáchin natëcaso nipirinuë'. Ina marë' Yosëri chiniquën ana'intarin. Iráca quëra huarë' nani yonquirin ana'intacaso'. Napoaton ni'cona canpitanta' nonpintochinëinquëma'. Chiniquën cancantatoma', no'tëquën a'chincó'.

⁵Nani nitotopiramahuë', naquëranchin sha'huitantaranquëma' yonquicamaso marë'. Iráca Yosë piyapinënpita Iquipito parti parisitopirinahuë', Yosëri nicha'ërin. Ya'ipiya noya pipiponaraihuë', ina quëran a'naquën co yanatëhuachinahuë', Yosëri chiniquën ana'intaton, ata'huantërin. Inapochachin iporanta' imaponaraihuë' nisha cancantohuachina', chiniquën ana'intarin. ⁶Anquëniro'santa' ya'nan nipon, ya'ipiya noya yonquipirinahuë'. Ina quëran a'naquën nisha cancantatona', co huachi Yosë yanatëpihuë'. “Quiyanta' nóyaco' ni'toi, natëinacoiso' ya'huërin,” topiso marë', co huachi Yosë'pa' ya'huëpihuë'. Nani Yosëri yonquirin chiniquën ana'intacaso'. Tashinanquë tonpopinan ya'huapi. Ayaro' tahuëri parisitopiquë' a'pararin. Co onporonta' cha'ësapihuë'. ⁷Iráca Sotomaquë ya'huëpisopitanta' pa'pi co noyahuë' yonquipi. Monshihuanacaisoáchin cancantopi. A'naratipita

taparo' nipi. Co ina pochin nicacaso hué' nipirinhué', napopi. Ina maré' Yoséri chiniquén ana'intérin. Pén inápa quéran a'paimarin ahuiquitacaso maré'. Sotoma, Comora, inapita huiquitopi. Ya'cariya ninanoro'santa' huiquitopi. Ayonquipoaso maré' ninshitérinpoa'. Inapita yonquiatéhua', "A'na tahuéri oshahuano'sa' pēnquē parisitomiatapi huachi," tēnhua'.

⁸Inapochachin iporanta' nisha a'china'piro'saso', hué'èiri ahua'yantérinso pochin cancantatona', inahuara yonquínēna quéran nonpin nanan imasapi. Na'con monshihuanatona', nitapicananapi. Co inso tēranta' yanatēpihué'. "Co insonta' camaiinpoaso' ya'huérinhué'," toconpi. Chiniquén nanantopisopita Yoséri acorinso' inapitanta' téhuapi. ⁹Iraca Moisésé chiminpachina, Yoséri anquēni hua'an a'paimarin nonēn pa'pitacaso maré'. Miquiri itopiso'. Sopairi yaosērētohuachina, nino'huipi. Naporó' anquēni chiniquén nanantaponahué', co nohuantérinhué' sopai pinocaso'. Co inaora ana'intacaso' yonquirinhué'. "Sinioro ana'inchiniquén," itérin. ¹⁰Nisha a'china'piro'saso' nipirinhué' Yosé yonquirinso' co nitotatonaraihué', téhuapi. Ma'sharo'sa pochin cancantatona', co yonquipihué'. Ma'sona tēranta' yanipachinara, nipi. Inapoatona', nitapicananpi. Ana'intacaso' ya'huérin.

¹¹¡Ma'huantacha nisapi paya! Nonpina'piro'saso', Caino pochin cancantatona' co Yosé natēpihué'. Paramo pochin cancantopi. Iraca Paramoso' coriquiráchin cancantaton, piyapi'sa' anishacancantérin. Corinta' iraca co noyahué' ninin. Co hua'ano'sa' yanatérinhué', no'huirin. Ina maré' Yosé nohuanton, chiminin. Inapita pochin cancantopisopita Yoséri chiniquén ana'intarin. ¹²Quisoso imaramasopita

coshatacaso maré' niyontonpatamara, nisha a'china'piro'santa' hué'pi. Naporó' Yosé yonquicaso nipirinhué', na'con o'otona', capa cancantopi. Co Yosé té'huatatonaraihué', napopi. A'napita catahuacaso' ya'huépirinhué', co nosoropihué'. Inahuara noya ya'huécasoráchin yonquipi. Ni'co' iyaro'sa'. Hua'qui' co o'nanpachinahué', no'pa' yaninomarin. Ina pochin nipachina, yararo'té' quénanpatamara, pa'yatērama'. "O'nan hué'sarin," topiramahué', co o'naninhué'. Ihuana' pa'nin. Inapochachin inapitaso' pēnēnpirinēnquémahué', nonpin nanan a'chintatēnēnquéma' co catahuaninēnquémahué'. Nara nitérinsona' yonquico'. Pi'pi tahuéri nanihuachina, nitacaso' ya'huérin. Co nitohuachinahué', "Nani chiminin huachi," ta'ton, hua'anēni nishitētérin. Itēnē chachin ocoirin ni'ton, noyá chiminin huachi. Inapochachin nonpin nanan a'china'piro'sa' ina nara pochin niconpi. Quisocriso nanamēn nitotaponaraihué', chimipi pochin nicatona', a'popi. Ina maré' chiniquén ana'intacaso' ya'huérin huachi. ¹³Pamanta' yonquico'. Panca pamatohuachina, notohuaro' sa'po', amoró', inapita quénin. Nonpina'piro'saso', ina pochin co sano cancantopihué'. Co noyahué' nipi ni'ton tapanacaso nipirinhué', co nitotapanpihué'. Ina maré' Yoséri ana'intarin. Tayoranta' yonquico'. Anotohuachina, tacopirin. Co huachi a'pininhué'. Inapochachin nisha a'china'piro'santa', tashinanquē pa'miatapi. Quisocriso a'pohuachina', parisitopiqué pacacaso' ya'huérin huachi.

¹⁴Iraca Inocori chachin inapita ninorin. Atan shiin inaso'. Atan quéran saota shinpita ya'huérin piquéran Inoco ya'huérin. Ninoton, naporin: "Sinioro chachin o'mararin huachi. Hua'huayatērahué' anquēniro'saré

chachin o'mararin. ¹⁵Naporo' ya'ipi oshahuano'sa' ana'intarin huachi. Pa'pi co noyahuë' nipi ni'ton, ana'intacaso' ya'huërin. Yosë no'huipisopita no'tëquën ana'intarin huachi," ténin iráca. ¹⁶Yosëso' noya nosoropirinpoahuë', inapitaso' ma'sha onpohuachinara, ina no'huipi. Co sano cancantopihuë'. Ma'sona tëranta' yonquihuachinara, nipi. Co noyahuë' cancantatona', napopi. "Quiyaso' noya noya nitotërai," ta'tona', chiníquën nonconpi. Co piyapi nosoroaponaraihuë', noyasha nontopi. Inahuara canacaiso marë' napotopi.

**Chiníquën cancantatëhua',
Quisocristoíchin imamiatahua'**

¹⁷Canpitaso nipirinhüë' iyaro'sa', noya yonquico'. Nosororanquëma' ni'ton, pënënanranquëma'. Quisocristo ca'tano'sanënpita sha'huitërinpoaso' ama naniantocosohüë'. ¹⁸"Ayaro' tahuëri naniriahüachin, co noyahuë' quëmapi'sa' ya'huërapí. Yosë nanamën tëhuaapi. Co noyahuë' cancantatona', a'naratipita nisapi," itërinpoa'. ¹⁹Inahuara nohuantopiso' nisapi. Co Ispirito Santori ya'coancantërinhuë'. Nisha a'chinatona', piyapi'sa' anishacancantopi, a'na huënton a'na huënton co huachi noya nini'tona', ya'huapihuë'.

²⁰Canpitaso nipirinhüë' iyaro'sa', Yosë nanamën na'con yonquico' noya noya imacamaso marë'. Inasáchin no'tëquën anitotërinpoa' Yosë pochin cancantacaso'. Naporahuaton, Yosë nontáco'. Ispirito Santo catahuarinquëma' cancanëma quëran huarë' noya nontacaso'. ²¹Inapotatoma', nani tahuëri nóya cancantoco' Yosë nosoro'inquëma'.

Ina na'con nohuantoco'. Quisocristo yonquiatoma', o'mantacaso' tahuëri ninaco'. O'mantahuachin, nosoroatonpoa', chimirin quëran nicha'ësarínpoa'. Yosë'pa' nanpimiataríhua'.

²²A'naquënso' co noya natëyátërapihuë'. Inapitaso' nosoroatoma', sanoanan quëran pënëncó' no'tëquën yonquicaiso marë'. ²³Ni'co' iyaro'sa'. Ma'sha pënquë anotohuachina, a'naroáchin manë' ama huiquitacaso marëhuë'. Inapochachin piyapi'sa' na'con pënëncó' ama parisitopiquë paacaiso marëhuë'. A'naquënso' nipirinhüë' nonpin nanan pa'yatatona', co noyahuë' nipi. Inapitanta' nosoroatoma', pënëncó'. Nipirinhüë', ama pi'pian tëranta' inapita pochin cancantocosohüë'. Napopiso' ama yonquicosohüë'. Ni'cona sopai minsëchinquëma' canpitanta'.

Ma noyacha Yosëso paya itahua'

²⁴⁻²⁵Tata Yosëso' ya'ipi nanitaparin. Noya a'paiarinquëma' ama anotëressó pochin tëhuëcamaso marëhuë'. Catahuahuachinpoa', co sopai minsëarinpoahuë'. Noya noya tapararinpoa' imamiatacaso marë'. A'na tahuëri ya'huërinquë noya ni'sarinpoa'. Inatohuaso' noya noya. Capa cancantarihua'. Tata Yosëíchin hua'anëntërinpoa'. Ina nohuanton, Quisocristo nicha'ësarínpoa'. Inasáchin catahuarinpoa' noya chinotacaso'. Ma noyacha Tata Yosëso paya. Iráca quëra huarë' chini chiníquën nanantërin. Noya noya ni'ton, ya'ipi piyapi'sari chinochina'. Inasáchin natëahua'. Ama onporonta' naniantahuasohüë'. Amen. Nani huachi.

Cotasë